



**ÁLVARO VILA ARAUJO**, voceiro do Grupo Provincial Socialista da Deputación de Ourense, en base ao previsto na Lei de Bases Reguladora do Réxime Local, ó artigo 91 e 97, entre outros, da Regulación de Organización, Funcionamento e Réxime Xurídico das Entidades Locais e o Regulamento desta corporación presenta unha **MOCIÓN PARA MANTER O ACTUAL CANON POR TONELADA DE RESIDUOS XESTIONADA QUE PAGAN OS CONCELLOS A SOGAMA E AVANZAR CARA NOVAS FÓRMULAS DE XESTIÓN DE RESIDUOS MÁIS RESPECTUOSAS DO MEDIO AMBIENTE.**

A Sociedade Galega do Medio Ambiente (Sogama), que é unha empresa pública autonómica participada á altura dun 51% pola Xunta de Galicia e dun 49% por Naturgy Renovables S.L.U., ten por obxecto a xestión sustentable dos residuos de 295 concellos galegos que abrangue unha poboación de máis de 2.242.000 habitantes a través da aplicación da denominada “estratexia dos tres erres” (redución, reutilización e reciclaxe), que complementa coa recuperación enerxética da parte non reciclábel. Sogama estableceu en 2019 unha bonificación do 10% no canon do lixo para os municipios que se comprometeran coa redución do volume de lixo e envases lixeiros, repercutindo esta rebaixa nos recibos da veciñanza. Desta iniciativa beneficiáronse o groso de concellos galegos que, no seu momento e de xeito paulatino, foron quen de diminuír as cantidades de ciscallos xeradas, observando as preceptivas esixencias medioambientais e evidenciando o bo funcionamento duns incentivos que redundaban nunha baixada significativa da factura dos fogares.

Porén das bondades dos resultados, a Lei 7/2022, de 27 de decembro, de medidas fiscais e administrativas, que acompañaba aos orzamentos de 2023, abre a porta á supresión da bonificación na contía do canon unitario do tratamento por tonelada. A revogación dos descontos queda supeditada ás “circunstancias económicas da Sociedade Galega do Medio Ambiente (...) por cumprir os obxectivos orzamentarios e as previsións do seu plan de viabilidade”, albiscándose xa a eventualidade de ampararse no aumento dos custos de luz e gas das súas instalacións para derrogar a bonificación. A resposta social e as protestas enarboradas polos concellos diante do eventual recorte fixo recuar ao goberno galego, que viu de rectificar substituíndo a súa inicial intención por unha bonificación do 15% condicionada desta volta, de xeito específico, ao traslado aos recibos da rebaixa á veciñanza e á implantación do contedor marrón, destinado aos residuos orgánicos de procedencia doméstica.

O consello de administración de Sogama aprobou o pasado 25 de xuño unha “actualización do canón” que factura a 295 concellos galegos pola xestión do seu lixo, pasando a cobrar 66,01 euros por tonelada e anunciando unha suba até os 78 euros por tonelada para o exercicio 2025. A Consellería de Medio Ambiente insiste que, aínda coa actualización, o canon de Sogama “segue a ser o máis barato de España” e imputa o incremento a “sobrecostos derivados de impostos estatais”. Segundo a lóxica do executivo comunitario, o aumento do canon e a desaparición do desconto do 15% é consecuencia directa da Lei 7/2022, de 8 de abril, de residuos e solos contaminados para unha economía circular, que, segundo a Xunta, fai que a planta de Cerceda teña que afrontar millónarios sobrecostos por mor dos impostos estatais, descargando a responsabilidade no goberno central.



## Grupo Provincial Socialista

Rúa Progreso, 32 – 2º andar  
32003 Ourense  
Tif. 988 317 972  
CIF: G32244345

En realidade, a Lei 7/2022 ven de adecuar o marco regulatorio español a unha directiva comunitaria de 2018, que grava a incineración e o depósito en vertedoiro ao estimar que son as fórmulas medioambientalmente menos recomendables para a xestión de residuos, sendo estas nas actualidade son as formas privilexiadas por Sogama: 60% incineración e 21% vertedoiro. Polo tanto, Sogama asume a totalidade do imposto estatal, que deriva dunha directiva europea, pola súa obsoleta xestión dos refugallos, non tendo mudado un ápice o modo de tratamento dos residuos desde 2010. E malia a nova realidade impositiva, os orzamentos 2024 da Xunta de Galicia contemplan un remanente de tesourería de 6.489.577 euros e contemplan beneficios cara o final do exercicio, non sendo certo en xeito algún que Sogama sexa deficitaria. A Xunta non está a respectar as recomendacións europeas no referente á xestión de residuos, o cal redonda nun incremento no pagamento de taxas e fai que Galicia se sitúe lonxe de cumprir cos obxectivos de redución e reciclaxe establecidos.

Por todo o exposto o Grupo Provincial Socialista presenta as seguintes **PROPOSTAS DE ACORDO**:

**PRIMEIRA.-** Que a Deputación de Ourense inste á Xunta de Galicia a manter o canon actual que pagan os concellos adscritos a Sogama de 66 euros por cada tonelada de residuos domésticos xestionada, máis o incremento correspondente do IVE, amais de salvagardar a actual bonificación do 15% deste canon unitario cos mesmos requisitos que rexeron até o de agora, resultando así un canon bonificado de 56,10 euros por cada tonelada de residuos domésticos xestionada, máis o incremento correspondente do IVE.

**SEGUNDA.-** Que a Deputación de Ourense inste á Xunta de Galicia para a implantación de medidas urxentes para avanzar cara unha xestión descentralizada dos residuos con plantas de proximidade, privilexiando a redución e a reciclaxe fronte á incineración e o depósito en vertedoiro, que son as fórmulas empregadas por Sogama que derivan, en último termo, nas acentuadas subas no pagamento de impostos.

En Ourense, a 12 de xullo de 2024.

Asinado: **Álvaro Vila Araujo**

**SR. PRESIDENTE DA DEPUTACIÓN PROVINCIAL DE OURENSE**

[socialistaourense@gmail.com](mailto:socialistaourense@gmail.com)

Facebook: [PSdeGdeOurense](#)

Twitter: [@PSdeGDepOU](#)